

۱ تموز
۱۳۴۱

تورک تاریخ انجمنی

مجموعہ سی



ايتانچ اوغوللری

ايتانچ اوغوللری قديمآ لاديق دخی دنیلان دکزلیده تأسیس حکومت ایتشلردر.
امیرلردن بوکونه قدر معلومز اولانلرینک اسملری بوجه آتیدر :

علی بك

یننج بك بن علی بك

مراد بك بن یننج بك

اسحق بك بن مراد بك

۷۳۲ سنه سی آناطولوی کزمش اولان ابن بطوطه سنه مزبورده (دون غزله)
یعنی (بلد الحنازیر) و (لادق) دخی تسمیه ایدیلان (دکزلی، طوکزلی) شهرینی
زیارت ایتشدر. اول زمان دکزلی امیری (اخرحروف اولان یانک فتحی واولکی
نونک فتحی وایکنجی نونک سکونی وجیم) ایله یننج بك اولوب بلاد رومک کبار
سلاطینندن بولندیغنی سیاحتنامه سنده یازار (۱) .

سیاح مشارالیه یننج بکه ملاقات ایلدیکی کی مخدومی مراد بکه ده کورشیدیکی
و (دکزلی) یه وصولی رمضان شریفه مصادف اولمسی حسبیله اولا یننج بکک ،
بعده اوغلو مراد بکک کندیسینی افطاره دعوت ایلدکریخی لسان شکران ایله یاد و تذکار ایلر.
شهر مزبورده کی مزارستانک اطرافنه دیوار انشا ایدیلیر ایکن زیرده صورتی
محرر بر کتابه ظهور ایتشدر :

(۱) هوالباق

(۲) بنی هذه العمارة فی ایام دولت

(۳) الامیر المعظم شجاع الدین تنج بك ابن علیک

(۴) مد الله ظله صاحبه خواجه لؤلؤ الذواق

(۵) احسن الله عواقبه

فی شهر رمضان سنه خمس وثلاثین وسبعمائة

بوکتابه دن یننج بکک پدری علی بك اولدینی اوکره نیلییور .

بوکتابه دن ماعدا دکزلیده بولونان سکهلردن یننج بکدن سکره اوغلو مراد

(۱) سیاحتنامه ابن بطوطه، « تحفة النظائر فی غرائب الامصار و عجایب الاسفار »، صیفه ۳۰۶

کوتاهیده کر میان اوغلو یعقوب ثانی نك ۸۱۴ سنه بی احیا کرده سی اولان «طیش مدرسه» نك دیوارنده مرکوز اوتوز سطر دن عبارت وقفیه سی قبارتمه اوله رق مرمر لوحه یه محکود کر (۱). مذکور وقفیه نك ۱۴ و ۱۵ نجی سطر لردن آکلاشیلورکه، طگوزلی نك (دگزیلی) خور قپوسنده ایکی باغچی سلطان بازید انانچ اوغلو اسحق بکدن صاتون آلمش وسلطان محمدده بونلزی آری آری یعقوب بکه احسان بیورمشدر. انانچ اوغلو اسحق بک ایسه دکرلیده حکومت ایدن اسحاق بک بن مراد بک ابن ینچ بک بن علی بکدر.

بووققيەدن آكلاشلدىنى اوزره دكزليده اجراى حكومت ايليان امير لر على العموم
(ايناچ اوغوللارى) ديوتلقىب ايدلمكده درلر. بو وثيقه ايتنا ايله مقاله مزك سرلوحه سنى
(ايناچ اوغوللارى) اولق اوزره تحرير ايلدك.

(مختصر سلجوقنامہ) روایت ہے غیاث الدین کیخسر و ثالث ۶۷۶ سنہ سی و قوعبولان
جمری وقعه سی (۲) موفقیت تامہ ایلہ برطرف ایلدکن صکرہ سلجوقی حکومتی
اطاعتدن خروج ایدنلری تأدیہ ایتدار ایلسی اوزرینہ (لادیق) و (خوناس)
اھالیسی امیرلری علی بکی اجانبہ میلی اولمسندن شکایت ایلہ طوتدیروب قرہ حصارہ
کوندرمشلر، مومی الیہدہ اورادہ قورقوسندن وفات ایتش (۳). بوقیدتاریخیدن علی
بکک مذکور سندہ دکتری امیری اولدینی اوکرہ نلکدہ در.

کړک شو وقعه تاريخه دن ، کړکسه اولجه اشعار ايديلان دکزلی کتابه سندن آکلاشلدينی اوزره علی بک نامنده برذاتک دکزلی امیری اولدينی ثابت اوليور . شمدی مستور قالان جهت ، علی بکک هويت ذاتيه سيله مذکور شهره هانکی تاريخه ونه صورتله حاکم اوله رق دکزلی حکومتی تأسيس ايلش اولماسيدر . توحيد بک دکزلی به عائد مقاله سنده « صاحب آتا ناميله معروف صاحب فخرالدين عليک وزارتی آباقا خان اعاده ايتديکنده لاديق وخوناس وقره حصار دوله سر لشکر لکنی

(۱) مذکور و قفیه، تاریخ انجمنی مجموعہ سبک ایک نئی جزئیات یوزاؤن آلتیجی صحیفہ سندہ در.

(۲) تاریخ انجمنی مجموعہ سی ، جزو ۱۳ ، دکنی امارتی

» » » » » (۳)

يعني قوماندانلغنى صاحبك ايكي اوغلونه تفويض ايتشىدى « ديمشدر (۱) . شو فقره تاريخه دن استنتاج ايلديكمز فكر ذاتيمزى بروجه آتى خلاصه ايدىيورز: « صاحب آتاك دفعه ثانيه وزارتي تقريباً ۶۷۲ تاريخنده در. اوغوللريني قره حصار دوله يعني قره حصار صاحب ولاديق يعني دكزلي وخوناس قوماندانلغنه صورت تعيينلري بالطبع صاحبك آباخانه استدعاسى اوزرينه وقوعبولمشدر . ودكزلي نك امر اداره سى ده بالطبع صاحب آتايه منسوب على بكة احاله قلمشدر . وقتا كه برقاچ سنه صكره يعني (۶۷۶) تاريخنده (جرى وقعه سى) ديه مشهور اولان هائله باشلامشدر كه ، انجمن طرفندن نشر ايديلان عثمانلى تاريخنده تفصيلاتيه اشعار ايلديكي اوزره ، وقوعبولان حر بلر نتيجه سنده صاحب آتاك ايكي اوغلوده مقتول اولمشدر (۲) . بوخير كدورت اترك دكزلي اهايسنى پك متأثر ومتهيج ايتسى وصاحب آتا اوغوللرينك قره حصار دن مستعجلاً جمع ايده بيلدكلى عسكره دكزلي اميرى على بكك برقوه معاونه كوندرمديكندن طولاي اوني اتهام ايدرك قره حصاره كوندرمش اولملري ممتلدر .

على بكك اهايلينك كندى حقنده روا كوردكلى معاملهنك كدرى وهنوز برحيات اولان صاحب آتادن مجبوبيتنه منضم اولان خوفى سببيله منزولاً وفات ايتمش اولسى مأمول و بناء عليه دكزلي امارتنك بدائى ۶۷۶ سنه سى اولدبني مظلوندر . ايلخان احمد خانك جلوسى مراسمنده بولنق اوزره غياث الدين كيخسرو ثاكت تبريزه كيتمش ايدى . مشاراليه ممالك سلجوقيه نك نصفنى كيخسرو عهده سنده ابقا ونصف ديكرينى غياث الدين مسعود ثانيه توجه واعطا ايلديكندن كيخسرو بونجه مساعى صرفيله مملكتك امور انضباطيه سنى يولنه قويه بيلمش ايكن بوصورتله نصفنك الندن آلمسنه صوك درجه متأثر ومتالم اولمش ومراجعات متواليه سى رهين حسن قبول بيورولماش اولمشدن منكسر القلب اوله رق ارزنجانه كلوب اقامت ايتشىدى . ۶۸۳ سنه سى احمد خانك وفاتيله مقامنه كچن آرغون خان سنه مزبورده برادري قنغر طايك كيفيت قتلنده غياث الدين كيخسرو ثاكتي ده ذى مدخل اولغله اتهام ايدوب ارزنجانه صورت مخصوصه ده آدملىر كوندره رك مشاراليه قتل ايتديرديكندن

(۱) انجمن مجموعه سى ، جزء ۱۳ ، صفحه ۸۱۰

(۲) عثمانلى تاريخى ، جلد ۱ ، صفحه ۴۶۴ - ۴۶۵

ممالک سلجوقیه سلطنتی منفرداً غیاث الدین مسعودک عهده سنده تقرر ایتشدرد .
 مشارالیه ایشه هیچ قاریشمزدی . امور حکومت موغول امراسیله ایلخان طرفندن
 منصوب وزیر و بیوک ، کوچوک مأمورلر واسطه سیله اداره اولنوردی . او ائشاده
 قرامانلیلر برحکومت تشکیل ایلدکاری مثللو حمید واشرف اوغوللاری ده قرامانلیر
 باقهرق حکومتلر تأسیسنه باشلامشلدی .

غریبه کی دکزلی امیری یینج بک ایسه پدرینک صورت وفاتی داغ درونی
 اولدیغندن استقلال ایچون بویله بر زمان فرصت بکله مکده ایدی . اهالی ده سلجوقی
 حکومتدن فک رابطه ایدلمدکجه ، و غوللرک اذا وجفا و ظلم و اعتسافاتندن خلاصک
 ممکن اولامیجغنه قناعت کامله حاصل ایدرک بکترینه قوه الظهر اولدقلرندن همان
 اوده لادیقده حکومت تشکیل ایلدی .

بوحرکت غریبه اولان قره سی ، کرمان ، صاروخان ، آیدین ومنتشا کی بکاره نمونه
 امتثال اولغله بعده مذکور امراده برر برر تأسیس حکومت ایلشلدرکجه ، بوحرکت
 استقلال جویانه دکزلیلر ایچون شایان تقدیر و تذکار بروقه مهمه در .
 فقره مزبوره یی بزه روایت ایدن تاریخ ، دکزلیده تأسیس حکومت ایلین
 ذاتک اسخی « اینانچ » بک اولمق اوزره قید ایتمکده در (۱) .

دکزلیده ظهور ایدن کتابه ده ایسه اسمی (تنج بن علی بک) صورتنده یازلمشدر .
 ابن بطوطه ایسه (یینج بک) تسمیه ایدلدیکنی یازیور . (عثمانلی تاریخی) اینانچ
 بک دییور . (تنج) و (یینج) کله لرینک شکل تحریریسی بربرینه بک مشاهدرد .
 بز بواکیسندن (یینج) اسمنی ترجیح ایدیورز . ابن بطوطه میر مشارالیه ایل
 بالذات ملاقات ایتش و اسمنی حروفیله حرکله لرله آریجه تحریر ایلشدر . (یینج)
 کله سیله علاقه دار اولان (اینانچ) کله سنه کلنجه : بونی ده مشارالیه ک شهرت شایعه سی
 اولدیغنی مأمول ایدرز . کله مزبوره « امین معتمد مؤتمن » معنالیته در . شهرت
 مزبوره احفادینه (اینانچ اوغوللری) صورتیه عنوان اولمشدر . بوده اولجه اشعار
 ایلدیکمز (کرمان و قیه سی) کتابه سیله ثابتدر .

حمید واشرف اوغلو کی اینانچ بک ده دکزلیده تأسیس حکومت ایلشیدی .
 بو یکی حکومتلر امراسی سلجوقی سلطانی طانیدقلری و آنجق امور داخلیه لرنده

مطلق العنان اوله رق بر نوع ایالت ممتازه حالی آ کدیردقلری تاریخلرک طرز بیانندن و محکوکات موجوده دن آ کلاشیلور .

سلطان غیاث الدین مسعود خانک (۶۸۳) سنه سی منفرداً تحت سلجوقی به قعودی زماننده مذکور بکلرک جمله سی مشارالیه بیعت ایلمشلردی . بونلردن اشرف اوغلو سلیمان بک (۶۸۷) سنه سندن صوکر ا سلطان ایله بوسبتون قطع رابطه و علاقه استقلال نامنی اعلان و اظهار ایلمشدر . بو کیفیت ده بکشپرنده کی مبانی قدیمه کتابه لرندن اوکره نلکده در . ۶۸۷ تاریخلی کتابه ده سلطان مسعودک نامندن صکره کندی اسمی یازلمقده ایکن ، مذکور تاریخدن صوکر ا کی کتابه لرک هیچ برنده سلطانک نام والقبابی یازلیوب یالکز کندی نام و عنوانی محرر بولمسیله ثابتدر (۱) .

دکتر لیلرک حمید اوغلو کی نائل اولدقلری سربستینک دها ایلروسنه کیتمدکلری کذا موجود کتابه لر دن منفهم اولمقده در .

۷۰۸ سنه سی غیاث الدین مسعود بن کیکاوسک وفاتیه حکومت سلجوقیه بوسبتون منقرض اولمغه اوج بکلری مستقل اولدیلر . فقط حمید ایل و دکزلی اوج امارت لرندن معدود اولدقلرندن قدیمی وجهله اداره اولنیورلردی .

۷۱۴ سنه سی قونیه نک قرامانیلردن استردادی وانلرک تأدیی خصوصی ایچون ایباخان خدا بنده محمد خان طرفندن بویوک بر اردو ایله اعزام اولنان امیر چوبانک آناتولی به کلی اوزرینه حمید اوغلی و دکزلی بکی هدایای مناسبه و لایقه ایله مشارالیه ک اردو کاهنه کیدوب تأکید و تأیید مطاوعت ایتمشلردی . ۷۱۶ سنه سی تخت ایلخانی به جلوس ایدن ابوسعید بهادر خانک صغری حسیله ایرانده ظهور ایدن اغتشاشاتدن بالاستفاده حمید اوغلودندار بک (سلطان) لقبی آلمش و همجوارینی ده کندوسنه بیعته اجبار ایلمشیدی (۱) . فقط (۷۲۲) سنه سی امیر چوبان زاده تیمور تاش بک آناتولی به والی اولدقده موغول امراسیله میانه لرنده ظهور ایدن حاده پدیری و ساطتیه برطرف ایدلکدن صکره (۷۲۴) سنه سی بر قوه جسیمه ایله اشرف اوغلو مالمکنه هجوم وضبط ایله حکمدارینی قتل ایتدیرمش ، بعده حمید اوغلو سلطان دندارک بلادی اوزرینه تجاوز و دندارک آنطالیه به طوغری چکلمسی اوزرینه اردوسیه جنوبه

(۱) انجمن مجموعه سنک ۲۷ نجی جزئنده : (آناتولیده اسلامی کتابلر)

(۱) انجمن مجموعه سی ، جزء ۱۵ ، صفحه ۳۳۰

طوغرى آنى تعقيب و آنطاليه حصارنده محاصره ايله ضبط و اسير اولان دندارى قتل ايلسى اوزرينه حرڪات عسكرىه ساحه سنك شمال كوشه سنده قالان دكرلى ايلي اميرى ينج بك بوبادردن نفسى و مملكتنى قورتارمق ايچون تيمور تاش بكة عرض اطاعت و اوج بكارندن بيله خراج مطالبه سنده بولونان مير مشاراليه هدايى كرانبها و مبالغ كليہ تقديم ايلش اوله جنى هويدادر . ابو سعيد خان ايله وزيرى امير چوبان ميانه سنده ظهوره كلان وقعه مشهوره دن طولاي خوفندن تيمور تاشك مصره فرار ايلسى اوزرينه حميد اوغلو متوفى سلطان دندارك مخدومى خضر بك اختفا كاهندن چيقوب پدرى ممالكنى استرداد ايلدكدن ماعدا اشرف اوغلو اولكه سنى ده ضبط ايلسى اوزرينه (۷۲۸) سنه سى دكرلى اميرى ينج بكده شرقى آنطولى ايله ارتباطى منقطع اولمى حسيله استقلاليت مطلقه سنى قازانمشدر .

سياق و سباق تاريخيدن آ كلاشيلديغنه نظراً ينج بك پك كنج ايكن پدرى مقامنه كچرلمشدر . بو صورتله مدت امارتى ياريم عصرى براز تجاوز ايدر . مدت امارتى مملكتنك آسايشيله اهايلسنك اكتساب رفاه حالنه حصر ايلش اولدينى اداره داخيله لر ينك سربستيسى استحصال خصوصنده مشاراليه قوه الظهر اولمى ريله ثابتدر . بالاده تخطر ايتديري لان فقرات تاريخيه نك ناطق اولدقلى محاربات و قتال ، سلجوقى سلاطينه اطاعتدن عدول و استقلاليت كامله يه وصول ايله (سلطان) لقبى آلمق هوا سنده بولنانلر ايچون وقوع بولمشدى . پك دورانديش اولان قرناومشاورلى القاسيله ينج بك بويه برهوسه مغلوب اولمى هرق آنجق استقلال داخيلسنك وبونك امر محافظه سيچون لازم كلان تدابير و سياستك اجراسنه توسل ايله مملكت و اهايلسى آفات حربه دن حمايه و صيانت ايلش و بالتأنى عجبولار ك نائل اولدقلى استقلاليت مطلقه يه ده حسب الايجاب نائل اولمشدر . خصوصات مسروديه مظهريت مجرد فطانت و درايث ذاته و استعداد فطرسى مقتضياتندن ايلرى كلديكى جهته بين الناس (اينانچ) صفتيله تلقب ايدلمش و بوشهرت احفادينده عنوان اولمشدر .

سياح ابن بطوطه ، اينانچ بكى (رومك كبار سلاطيندندر) صورتيله ثنا ايلش ايسه ده مشاراليه ك استقلال تامندن صوكراده (سلطان) عنوانى آلمدينى (۷۳۵) تاريخلى كتابه دن اوكره نلكه در . دكرلى كتابه سنده يالكرز (امير المعظم) عنوانى محكوكدر .

ینج بکک تاریخ وقاتی معین دکلسده سن طبیعی یه واصل اولسی حسیه (۷۳۵) سنه سندن صکره چوق یاشامادینی مأمولدر .

مشارالیهک نامنه سکه ضرب ایتدیرمش اوله جفی درکار ایسه ده موجودی هنوز کور یله مامش ، آنجق یرینه قعود ایدن مخدومی مراد بکک اندر بولنان آچقه لرندن اوج نوعی منظور من اولمشدرکه ، احمد توحید بک بونلری مجموعه نك اون اوچنجی جزئده نشر ایلشدر .

مذکور سکه لرك (۱) نومرو لیسنك وجهنده (اضعف العباد عبده مراد) وظهرنده (ضرب بمحروسة لادیق) مسکوکدر . مذکور سکه لرك دکزلی امیرینه منسوب اولسی (لادیق) محل ضربیه ابن بطوطه نك ینج بکک مراد ناملی بر مخدومی بولندیغی اشعار ایلمی صورتیه در .

دکزلی قصبه سی قدیم (ایدرالا) اولوب (۱) الیوم (اسکی حصار) نامیه یاد اولنان (لاؤدیکه آ) شهری اها لایی طرفندن اطراف دیوار ایله محاط بر موقع مستحکم اولق اوزره تأسیس قلنش ایدی . مشهور (آنتیوخوس سوتر) زوجه سی نامنه بعض شهرلر تأسیس ایتدیرمشدرکه ، بونلره (لاؤدیکه آ) تسمیه ایدیلوردی . دکزلی قربنده کی (لاؤدیکه) ده بونلردن بری سیدر .

بالآخره بو اسملر بالتحریف (لادیق) نامنه تحویل ایشدر . سیاح ابن بطوطه نك دال حرفنك اوزرینه بر نقطه وضعیه (لاذق) املاسیله یازماسی سوریه ساحلنده کی (لاؤدیکه) شهرینك (لاذکیه) صورتنه تحولندن طولانی بورانی ده او یله ظن ایلیندندر . (دکزلی) خرستان النده ایکن اها لیسنك چوق طوموز بسلدکاری سیبیه (طگوزلی) دییه آد قویمشلردی . شهر اسلام الله کچنجه (دکزلی) یه ده (لادیق) اسمی ویرلش و سکه لرده اولوجهله یازلش ایسه ده (طگوزلی) نامی رفع ایدیه مدیکندن بالآخره بونامه قریب (دکزلی) تسمیه ایدلشدر .

مراد بکک سکه لرندن ایکی نومرو لیسنك وجهی (الملك لله عبده مراد) ، ظهري (ضرب بمدينة لادیق) ، اوج نومرو لیسنك وجهی (الملك لله عباده مراد) وظهري (ضرب بمدينة لادیق) عبارله لرینی حاویدر . مع التأسف هیچ برنده تاریخ یوقدر .

بو سكه لرك هيئت عموميه سنى نظر مطالعه يه آيرسحق محتوياتى بربرينه مشابه اولديغندن آيرى آيرى تاريخلرده ضرب ايدلمش اوله جقلى آشكاردر . آنجق متداول بر سكه قالبنك دكشديرلمسى، يا حكمدارك وقاتيله يكي حكمدارك نامنه سكه ضرب ايتديرمك ضرورتيله ياخود بر احتياج مالى ايله اولوركه، بو نوع سكه لرده اسكى متداول مسكوكاته نظراً يا وزنى تنقيص ياخود كوشى تغشيش ايديليور . طبعيدركه، بويله سكه لرك دكشمه سى آره سنده بر آرز زمان مرور ايدر . ايسته بو نظريه يه ابتناء مراد بلك مدت امارتى همان بر مدت قيله يه مقصور اولدينى آ كلاشيليور . جاب نظر دقت اولان بر ماده دهسا واردركه، اوده ايكي و اوچ نومرولو سكه لرك وجهنه اسمندن اول (الملك لله) يازلمش اولماسيدر .

سلجوقى حكمدارلرى سكه لر ينك وجهنه معاصر لرى اولان خليفه لرك نامنى (الامام المستنصر بالله امير المؤمنين) (الامام المستعصم بالله امير المؤمنين) مثلاً يازديرلردى . (۶۵۶) سنه مى صوك خليفه عباسى اولان مستعصمك شهادتيله بغدادده خليفه قالمينجه خليفه نامى يرينه (كلمه شهادت) و يا (ائنيه) يازلمغه كيخسر و ثالث زمانندن اعتباراً باشلانمش ايدى . آنجق موغول اداره سندن شدتله تفر ايدن ويا انلره بويون اكمك ايستمينلر شكاي ت آميز بر صورتله (الملك لله) و (المنة لله) مثلاً و موغول اداره سندن لطف كورنلرده (العظمة لله) و (العزة لله) كى ائنيه يازديريلورلردى . ايسته شو مطالعه يه ابتناء ايله مراد بلك ايكي و اوچ نومرولى سكه لرنده كى (الملك لله) جمله سنى وضع ايلسندن مشار اليك بر فلاكت سياسيه يه اوغرا ديغنى استدلال ايديلورز . امير مشار اليك تاريخ وفاتى ويا مسند امارتدن رفعى حقه ده معلومات قطعيه تاريخيه يوقدر . حتى كنديسندن صوكرا اوغلو اسحق بلك امير اولديغنى ده موجود سكه لرك دلالتيله اوكره نيورز . ايكي عدددن عبارت اولان بو آقهلردن برينك وجهنه (كلمه شهادت) ، ظهرنده (اضعف العباد اسحق بن مراد) ، ايكنجى سكه دن وجهنده (كلمه توحيد) و آلتنه (عبدالله اسحق) ، ظهرينه (ضرب بمدينه لاديق) تحتنه ارقام ديوانيه ايله (۷۶۳) تاريخى يازلمشدر . ايكي نومرولى سكه دلالتيله پدرى مراد بلك مذكور ۷۶۳ سنه سندن مقدم وفات ايلديكى و كنديسك ده امير بولدينى اوكره نيليور .

اسحق بلك بدايت امارتى قطعى صورتده بيلنمديكى كى، انتهاى حكومتى ده قطعى اولارق معين دكلدر .

خلیل ادهم بك افنديك نشر ایلدیكى (آل کرمان کتابه لری) میاننده
ابتدای مقاله ده اشعار ایدیلن کوتاهیله ده یعقوب بك وقیه سی ایضا حنده حاشیه
اوله رق « (طبکوزلی) بو کون علی العموم (دگزیلی) یازیلور . منجم باشی (جامع
الدول) نام تاریخنده کرمان حکومتنه تابع اولان قصبه لری تعداد ایتدیکی صرده ده
(طبکوزلی) و (خوناس) قصبه لری یادایدیورکه ، (خوناز) (دگزیلی) یه یقین بر یردر .
بوندن آکلاشیلان کرمان اوغوللری تاریخ هجرتک یدی یوز سنه لرنده احوالی یه
قدر توسیع ممالک ایتکه باشلامشدر « (۱) دنیلمکده در :

احمد توحید بکک (کوتاهیله ده کرمان بکری) عنوانلی مقاله سنده (۲) سلیمان
شاه بن محمد بکک وقایی صرهنده سلیمان شاهک حکومتی امتداد ایتش اولدینی
کبی کرمان مملکتی ده (دگزیلی) و (قره حصار صاحب) ک الحاقیه توسع ایتدیکی
وزیرده محرر و ثائق ده اشعار ایشدر . دگزیلیده جامع کیرک جهت شمالیه سنده کی
دیوارده بولنان کتابه :

جدد هذا المسجد المبارك
السلطان المعظم الکر میانه
سلیمان شاه ابن محمد بك اطاله الله بقاء
سنة سبعین و سبع مائه

و انجمن مجموعه سنک (۱۳) نومرولی جزئنده کی (دگزیلی) مقاله سنده ده
(دگزیلی) یی ضبط ایدن سلیمان شاهک تاریخسز اوله رق لادیقده مضروب برسکه سنی
یازیورلرکه ، مذکورسکه نک وجهنده (کله توحید) ظهرنده (سلیمان بن محمد لادیق)
محرر در . بالاده کی کتابه محتوباتنه نظراً (۷۷۰) تاریخندن مقدم دگزیلی امارتی
مقرض اولمشدر .

سبب انقراضی اراضی سنک وسعتسزلی وقوه عسکریه و قدرت جریه سنک ده
او نسبتده آز بولنمسیدر . کرمان بکری نک امریله کوندریلن چاپولجی چته لری
متماًدیاً قریه لرینه هجوم ایله اهالی یی جانلرندن یزار و امیرلرندن تبرید ایدیورلردی .
بواصول کرمانلیلرک قدیم مسلکی ایدی . ارطوغرول غازی (سکود) ده یرلشنجه یه قدر


(۱) انجمن مجموعه سی . جزء ۲ ، صحیفه ۱۱۸ حاشیه سنده

(۲) » ۸ » ۵۰۸

(قره حصار صاحب) دن (قره جه حصار) ه كلوب اطرافنى غارت ايدى يورلردى (۱). سلطان غياث الدين مسعودك اسكيشهر ايله برابر (اين اوگى) نى عثمان غازى اولككسنىه الحاقى مشاراليسى كرميانلىره قارشو اقدارائلك مقصدينه مبنى ايدى (۲). ۷۳۲ سنه سى بو طرقلرده سياحت ايدن ابن بطوطه (قره آغاج) طريقيله (قل حصارى) ندن چيقوب (دكزلى) يه ككه چكى زمان مذكور حصارىكى يانتى سواريلر ترفيق ايتمشدى. اوكا كرميان طائفه سنك يزىد بن معاويه ذريتندن بولنديغنى و مركزلىرى (كوتاهيه) اولديغنى سويلش اولدقلرندن بىچاره سياح بو روايتى صحيح ظن ايدوب قورقوسندن (كوتاهيه) نى زيارتدن فراغت ايلشدى . كرميانلىرى بويله بر بهتان ايله توصيف ايللىرى مجاور حكومتلره تابع كويلره چاپوچلى چتلىرى سوق ايله اهاالىسنه مرحمتسزجه معامله ايللرندن طولايى ايدى . دكزلى حكومتك بر قسيم كويلرى ناچارلقدن كرميان حكومتى تابعيته كچمش اوله جق كه ، مراد بك سكهسنىه (انلك لله) عبارسى يازديرمشيدى . يعنى دكزلى حكومتى ده اوزمان فلجه اوغرامشدى . بالاده اشعار ايدلديكى اوزره سليمان شاه بن محمد بك ده بو مفلوج حكومتى بوسبوتون رفع ايله اراضيسى ملكنىه الحاق ايدى يوردى .

ابتداى مقاله ده يعقوب ثاينك (كوتاهيه) ده كى بر مدرسه ده مرمره محكوك وقفه سنده بيلديرم سلطان بايزيد خانك دكزليده بعض محللارى اناج اوغلو اسحق بكدن ساتون آلدىغنى محرر اولديغنه نظراً اسحق بكك سلطان مشاراليه عهدىنى ادراك و (۷۹۲) سنه سى خطه كرميانىه نك ده ممالك عثمانيه يه الحاق ايدلديكىنى و بوضورتله كندىنه فلاكت كتورنلرك عين فلاكته دوچار اولدقلرىنى كوروب تشفىء صدر ايلش اوله جنى ايضاحدن وارسته در .

على



(۱) نجيب عاصم و محمد عارف، عثمانلى تاريخى، صفحه ۵۶۷ - ۵۶۸

(۲) » » » » ۵۸۱ - مذكور تاريخك

۶۱۲ و ۶۱۳ و ۶۱۴ نجى، صفحه لرى بوياده شايان تدقيقدر.